


Biografía di Amado Eulogio Rosina

Amado Eulogio Rosina a nace na Aruba dia 13 di September 1953, na Concessielaan. Amado a nace na cas, no na hospital. Amado su mama ta naci na Corsou na 1917 y a bini Aruba ora e tabatin 20 aña di edad. El a biba setenta aña na Aruba. Na 2007 el a fayece na edad di nobenta aña. Nomber di su ta Oscar Pilgram. El a fayece na Trinidad, den decada ochenta di siglo pasa. Cu un aña di edad Amado a bay biba na Tarabanaweg. Amado a biba na Tarabana te cu 27 aña di edad, prome cu a traha cas. Amado tin cinco ruman. Mildred, ta cumpliando 82 aña awor. Otro ruman muhe ta Stella di 81 aña, kende a bay Inglatera na 1960. Un otro ruman homber ta Wilfred d.f.m. kende tabata biba na Hulanda. Su otro ruman ta Stanley y e ta bay cumpli 70 aña. Amado ta e ultimo yiu. E ta casa cu Astrid Kock. Su fecha di nacemento ta 23 di januari 1962. Amado su yiu mayo ta Anushka Rosina y tin cuarenta aña. Yiu di Amado cu yama Arcadio, lo mester tabatin 35 aña aworaki. El a fayece. Joshua ta un otro yiu cu ta biba na Hulanda. E ta un artista, e ta canta. Stanley su ruman tabata e drummer di S-United. Pero prome cu esey Stanley a toca tambe cu Joy Kock den Caribbean Hotel. Nan a toca na Divi divi hotel tambe. Pero semper el a combina musica cu su trabou di electricien tur dia.



Segun Amado e bida atristico ta cu musica a cambia su bida y rumbo, pero a scohe pa e rumbo di bon.

Te awe Amado ta tocando den hotel, y e tin grupo di hende cu e ta trece hunto tur siman. Tin cinco aña cu nan ta topa tur diaranson anochi, tur ta ariba sesenta. Anto nan ta haci “wandel voetbal”, ariba yerba, soda curpa. Ta haci oracion ora caba, tur hende ta bin hunto haci un oracion pa cualkier amigo cu ta malo, E cos ey a bira un cos top! Dus e mesun cos Amado a keda haci. Amado ta kere cu un hende mester haci sport. Tur cos cu Amado haci mester ta na midí! Nada no mester ta dimas. Y bo mester tin habilidad di acepta di locual no por!

Segun Amado bo mester tin habilidad di acepta di locual no por!

E bida artistico

E carera musical a cuminsa den e unico forma cu e tabata por a cuminsa. No tabatin otro escogencia! Pues, si bo tin cu bati riba bleki di lechi, bo tin di bati riba bleki lechi, of riba caha. Bay matansa (abattoir) busca e cueronan di bestia, anto rek nan pone na solo, pa nos haya tambu. Practica hopi percusion, pasobra no tin nada otro. Tur hende ta wak, bo ta sinti ki bo ritmo ta, si bo por toca percusion. No tabatin scol di musica. Ora cu a haya tino, tabatin un Cultureel Centrum, pero financieramente tabata hopi dificil pa bay ey. Amado a fia un guitarra di un

un mucha homber mas grandi banda di cas, anto ta corda cu tabata train toca e tema di “Bad Masterson” cu tabata un pelicula preto cu blanco na television. Anto esey Amado a train, pero tocando e cu duim. Dus cu duim. Anto ora bo por “master” esey, ta mescos cu bo a slaag! Hahaha... Amado tabatin, diesun of diesdos aña y cu gana di purba semper. Hopi mucha homber a rondona Amado y e tin e guitarra buta riba su pia. Despues ta steelpan a haci su entrada. Buchi Boekhoudt for di e tempo ey caba, ta buta e drumnan corta riba candela, haci nan moli pa e

cuminsa traha steelpan. Asina a bin haya un set di bari den Tarabana y a cuminsa train. Pero di biaha Amado a coy e “first pan” pa por a saca melodia. Amado a bira e “first pan player”, pero tambe el a bay train riba e “grumbler” y riba e “fourtune”, tur e barinan cu tin. E tabata mas jong, pero dado momento e por a toca tur e barinan. Dus tabata bira mas facil pa e muestra un compañero ora e toca un melodia, si e ta toca e grumbler pa e sa e sla di acompaña. Training ta tuma luga casi tur anochi, ta

train ora tin luna, pasobra no tin luz. E ta shemering, dus ta bisa tin luz y nos ta probecha e ora pa train. Asina ey a bay toca den carnaval hopi trempan na 1963/1964 cu bari na garganta. Anto e tempo ey, ta cabuya di coriente ta uza pa wanta e drum na garganta! Pero door cu e cabuya di coriente ta corta bo garganta, nan ta coy cahanan di carton, cort'e diki hink'e bou di bo garganta.

Compara cu awor, antes e carnaval tabata largisimo! Aworaki ta mita distancia e ta! Y tabata cana sin cobra, no tabatin pago. Ora parada caba ta bay buta tur e barinan ey bou, anto dirigentenan ta pasa duna un pan of algo otro pa come, anto nan ta bati riba bo lomba, bisa bo "hopi forsa!". Na 1968 Amado a toca pa prome biaha den hotel na Manchebo. Anto for di ey, el a haya chens di bay Aruba Caribbean Hotel pa topa cu Willy



Amado Rosina a toca prome biaha den Manchebo Beach Hotel na aña 1968

Tjong A Jong y Ebby Peterson. Amado su instrumento ta baho. El a traha un tempo cortico den Aruba Caribbean Hotel. Trio Huasteca tabata toca e tempo ey caba eyden. Como cu Eric Escalona a kibra su man hungando basket pa Aruba Juniors, Etty Toppenberg a pidi Amado pa bin toca baho. Asina Amado a drenta Trio Huasteca, pasobra e tempo ey no tabatin e grupo Dedhalavi ainda. Asina e carera a cuminsa y despues a "switch over" pa Dedhalavi. Pues, for di Etty Toppenberg pa Dedhalavie, fo'i Dedhalavi pa High Notes na Holiday Inn. Amado a toca cu Pancho Bonariba, despues na e hotelnan chikito y te ainda e t'ey. Dus si bo wak bon, 51 aña largo Amado ta na hotel caba.

Instrumento musical

Amado no a specialisa den ningun instrument. Loke si el a specialisa y duna hopi balor na dje ta harmonia musical. Amado a studia cuater aña harmonia y tambe piano cerca Roberto Montiel (dfm). E tabata bay den añanan setenta cu vakantie Merca pa tuma tayer (workshops). El a tuma les di musica via correspondencia di Berklee College online y tabata paga pa nan. E resto ta trayectoria. Toca hopi, toca tur dia y compañía show. E tempo aya Amado tabata compañía show di Las Vegas hopi.



Amado Rosina ta estrena e orgel den Sheraton hotel

E tabata director musical, anto "al doende" bo ta siña hopi. El a gana hopi experiencia. Amado a bin cu un orgel for di Corsou sin paga p'e. El Gordito de Oro (Angel Job) a bis'e pa e bay cune y ora cu e haya e placa, mand'e. Asina a sosode tambe. Amado a estrena e orgel den Sheraton cu Dedhalavie. Ainda Amado tin e orgel aki bon warda den su maleta (case) y e ta funciona. Ta di aplaudi e aprecio cu Amado tin pa un instrumento cu e ta considera un reliquia.

Preparacion musical

Amado ta kere cu un bon buki cu Roberto Montiel a dun'e di acordes y arpeggios a yud'e masha hopi. Bo ta haci tur ehersicio cu un man, despues cu e otro man y despues tur dos hunto. Amado ta bisa semper e cos ey ta dificil y bo ta fada na cierto momento. Pero, si bo dedica un siman di dos tres ora, ora bo bay toca bo ta mira un facilidad pa bo haci "licks" cu bo dedenan. E ta duna fruta! Sin studia, si bo no dedica "it's not gonna go".

Desaroyo musical

Na hotel antes a toca algun cos di Aruba, pero ochenta porciento tabata cancionnan Mericano. Amado tabata uza un tape recorder pa saca plesanan y tabata saca un score pa nan mes. Tabata train cuater biaha pa siman cu Dedhalavie y ta toca seis biaha pa siman. Amado a dirigi e Festival di Tumberito pa mas o menos binti aña. El a fungi como director di Festival di OTI. Amado a aregla pa OTI y pa tumba festival. Tabatin un grupo musical di amigonan cu nan a yama "Untouchables". Amado a biaha cu Trio Huasteca pa Hawaii, Venezuela y Corsou diferente biaha. Cu Dedhalavie el a biaha varios biaha y tabata graba tur e disconan den exterior. Entre otro el a graba na Radio Continente na

El a bay Baranquilla y despues a graba na Bogota cu Eduardo Maya. Amado a biaha riba invitacion di Toeristen Bureau pa Convention di Aruba. E grupo a toca na Mexico City, Acapulco. E tempo aya tambe a biaha hunto cu nan Sr. Betico Croes. Durante un convention na Acapulco, Dedhalavie a sali e miho grupo di mundo. Anto un carta a bini: nan a haya e regalo (invitacion) cu nan tabata tin mag di bay cas di Cantinflas na Mexico. E ta un cas grandi den sero, anto e honor tabata di bishita e cas y shake hand cu Cantinflas. Y despues nan a biaha pa algun convention atrobe cu High Notes pa bay toca. Nan a biaha cu gobierno y a toca cinco dia na Florida, Tampa y Jacksonville. Bo ta bay cu bus



The Dedhalavie Combo

core cinco ora, bini Aruba un dia, despues nan ta toca cinco luga na e parti norte America, New York, New Jersey, tur e luganan ey. Amado a dirigi e festival Voz i Landia pa trinticinco aña. Tabatin un festival cu tabata organisa cu yama Voz di Oro. Ta e festivalnan manera Voz di Oro y tambe OTI ta buta cu e exigencia ta bira halto.

Ariba disconan di Dedhalavie. Amado tabatin e suerte cu na Radio Continente na Caracas unda a bay haci grabacion, for di e tempo ey caba, bo ta mira e tecniconan ta lesa musica. E tempo ey ta disco di largo duracion (longplay) so tabatin. Dedhalavie tabatin un cancion cu yama "Hende di Money". Hende di money e coro tabata pero e tabata zona manera "hende di mondi". Anto nan a yama na radio pa stop e. Amado tabata encarga cu e preparacion di cd, esta composicion y areglonan di Dedhalavie. Dus tur cantica, si Dhaddy traha un cantica, e ta cant'e y Amado ta tende y ta scirbie. Si ta un cantica

cu Lando ta bay canta, Lando ta cant'e cu su guitarra, Amado ta tende y ta scirbie. Amado tabata combina deporte di futbol y toca anochi den hotel. Na edad jong Amado a perde stem door di toca y canta den casino. E mes no tabata huma, pero e huma den casino a afecta su stem dado momento di su carera musical. Pero despues el a haya lesdi un profesora di Berklee con pa uza su diafragma. El a ricibi tratamiento di logopedista y cantante Abath tambe. Su dokter na Boston a bis'e cu e lo no por canta mas. El a bisa e dokter cu Dios ta bay yud'e pa e bira bon pa e por sigui canta. Te awe ainda Amado ta cantando.



Amado Rosina tabata combina deporte di futbol y toca anochi den hotel

Dedhalavie tabatin un cancion cu yama "Hende di Money" Hende di money e coro tabata pero e tabata zona manera "hende di mondi". Anto nan a yama na radio pa stop e.

E parti Internacional

Amado a toca cu Trio Huasteca na Hawaii, Venezuela y Corsou diferente biaha. Cu Dedhalavi el a graba tur e disconan den exterior. Entre otro el a graba na Radio Continente na Caracas. A graba na Baranquilla y despues na Bogota. A toca cinco dia na Florida, Tampa y Jacksonville cu High Notes, y cinco dia na New York y New Jersey.

Grabacion realisa

Cu Dedhalavi Amado tin cancion nan propio composicion cu a graba na Venezuela y tambe Colombia.



Amado Rosina ta toca Steelpan

Grupo musical cu a forma parti

Grupo musical cu a forma parti di dje ta na cuminsamento cu Steelpan na Hotel, Despues a toca cu Willi Tjong A Jong, The Untouchables, Trio Huasteca, Dedhalavi, despues a bay Holliday Inn pa forma High Notes, despues a bay toca cu Pancho Bonariba den orkesta. Despues banda nan chikito a wordo forma pa toca happy hours.

Sugerencia pa futuro generacion

Amado ta bisa cu tin masha hopi talento na Aruba. E ta kere tabatin hopi den nos tempo tambe, pero e tempo aya, no tabata pone mucho atencion manera awor. Ta sugeri e hubentud pa tuma les. Tuma les di musica, no laga un “you tube” cu tur e sort’i cosnan ey bisa bo cu bo ta siña. Bo ta siña algo berdad, pero tuma les! Tuma les for di un hende, anto bo ta combin’e cu cualkier mashin cu bo kier, pero tuma les y practica riba bo instrument pa bo por domin’e. Mi ta corda cu Montiel a yega di bisa cu un di e armanan mas grandi tabata cu bo mester por papia musica. Manera si bo bisa Amado bo ta toca, pero Amado ta bisa bo Amado kier papia un rato, dus nan ta bay coy la menor. Si mi bisa bo la menor, si bo no por bisa amado e tres nootnan di la menor, anto e ora nos tin un problema. Bo ta tocando nan, pero bo no por bisa mi ta kico bo ta toca? E ta fout! Tur loke bo haci mester por ta vocalisa. Pues muchanan tin cu siña e nootnan pakico e ta minor, pakico e ta major, pakico e ta dominante septima etc.



Homenahe pa Amado Rosina



Amado Rosina a toca Flauta den grabacion di The Dedhalavie Combo